

敬

事

草

敬事草卷七目錄

救程紹揭帖

再救程紹揭帖

典禮揭帖

言湖廣當增設視師大臣揭帖

三救程紹揭帖

請補科道并乞假揭帖

乞罷免簡閣臣疏

再催補閣揭帖

回處魏巡撫揭帖

請舉典禮揭帖

言時事揭帖

再催補閣臣疏

回諭札揭帖

入直揭帖

言陳奉揭帖

催發引奏本揭帖

回典禮諭札揭帖

擬上典禮勅諭揭帖

催發典禮勅諭揭帖

回諭札揭帖

催發吏部陞官本揭帖

封還張忠議鹽本揭帖

催發吏部堂官引咎本揭帖

言孫朝叅魏允貞事揭帖

謝考滿賜鈔錠羊酒疏

言隴澄宜賞揭帖

言征播功狀揭帖

辭考績加恩第一疏

辭考績加恩第二疏

拜命請添閣臣揭帖

請留蕭大亨陞李應策揭帖

回修琉璃河橋揭帖

催點發各省考官揭帖

請禱雨揭帖

擬諭帖

請處遼東撫鎮等官揭帖

回廟享諭揭帖

報平播揭帖

回諭札揭帖

請典禮揭帖

敬事草卷七

柱國少傅兼太子太傅吏部尚書中極殿大學士臣沈一貫

救程紹揭帖

題歲間吏科左給事中程紹一本為中官不宜
輕信外政不宜輕假伏望 聖明稽 祖訓之
嚴杜專擅之漸以正國體事奉 聖旨韓薰已
有旨從輕處了程紹這廝又來黨救瀆激本當
拏解究問姑且着革了職為民不許朦朧推用
吏部知道欽此是時逼歲將除方當恭賀元節

臣不敢輕有塵請連日輾轉心猶未忘夫紹以
不諒瀆言上激聖怒小臣承譴復何所辭顧
言官之職專在諫諍而人才進退事關吏科揆
之事體似亦不得不言者心實效忠非有他也
仰惟皇上聖仁天育廣度海涵往時言官有
被黜者輔臣救之多蒙俯宥天下至今以為
傳誦史冊萬古以為光輝今臣雖孑然一身亦
忝輔臣之數而六科寥寥止存七人紹復見黜
則辦事者益少矣伏望皇上少霽天威俯容

程紹照舊供職如謂罪難盡宥則重加罰俸以
示懲創以彰恩慈今當三陽交泰之時萬物發
生之候群心欣願德澤臣亦瞻望光輝憑特
寵私萬申祈請

二十八年正月初三日上

再救程紹揭帖

臣謹題年間科臣程紹一本奉 聖旨韓薰已

有旨從輕處了程紹這廝如何又來黨救瀆激
本當拏解究問姑着革了職為民不許朦朧推
用吏部知道欽此臣于時不勝駭愕亦不暇致
詳倉皇具揭為紹申救于今年正月初三日上
進後接各諫科道官公疏揭帖到臣臣再三披
閱始悟 聖意似非責紹而所發為民之旨或
為韓薰也蓋臣以孤身在直更無交資思塞神

蒙筆輕語失但知急救言官不知錯會 聖意
自愧不已追咎不已伏乞 恩慈俯加鑒宥今
科道二疏未發則紹方以待命為恭未敢遽出
而該科事冗擔閣日多伏乞 皇上早賜批發
慰留令紹得安心供職庶于政體無碍 聖德
有光臣亦得以少逭不詳不審之戾矣

正月初
八日上

典禮揭帖

題臣惟昔之愛君者進諫必于無人之所蓋諫
于有人之所者不無邀名之意諫于無人之所
者乃出愛君之誠故也臣備員輔弼托在腹心
凡遇大事必以揭請正倣此意今 國家第一

典禮關係最大歲月已愆佳期甚迫有萬難再
緩者無過 冊立冠婚群臣合詞豈其出于邀
名臣之屢揭實乃由于忠愛必祈回天俯採非
可姑置不行者也臣謹披心再陳之蓋 皇長

子長髮以來屢奉 綸音念睿齡之過期嘉體
氣之充足篤愛真慈肫懇深至不由請乞霈發
宸衷朝野傾心比往更切舊年冬禮部尚書余
繼登等以為請吏部等衙門尚書李戴等以為
請定國公徐文璧等以為請侍郎張養蒙以為
請科道官以為請臣偕首輔志臯屢以為請連
章累牘無非仰述 皇上之慈訓非能于慈訓
之外更增一詞也顧候 旨踰時未蒙 宣示
意者以建儲之典宜於春成婚之候宜于春時

至而事起耶乃今 皇長子年已十九歲當三
陽時序更新脩已旬日日月易邁瞻望彌勤首
輔及宗人府等衙門皇親等官又後先以為請
矣前此猶可少俟于今寧復可俟乎古人有云
男子生而願為之有室女子生而願為之有家
父母之心人皆有之 皇上天性之愛萬倍恒
情燕喜之春萬臻景福而 皇長子年登弱冠
尚爾垂髫不得當成人之稱遂室家之願於體
不雅於禮不安試揆父母之心能無惻然深動

乎易傳有之父父子子兄兄弟弟夫夫婦婦而
家道正正家而天下定矣夫定天下由於正家
正家由於一家之人各得其正然則此禮之不
容稽也就一家言父子之所以親兄弟之所以
序夫婦之所以別者係于斯就天下言禮得而
天下定禮失而天下違者係于斯關於治體甚
非細也臣遭際 聖明本欲希都俞吁咈之盛
而相忘于無言靜聽明綸用彰睿斷私心過計
恐 聖意復遲則群心愈惑而多口復滋又恐

傳示不預則臨期驟行而所司罔措况股肱之
義休戚惟同典禮一日之稽即臣愚一日之罪
安得不披丹密言伏望 特下玉音令禮官諏
吉具儀早成 冊立冠婚諸禮則國本不搖人
心慶祝萬年有道之長端在於此臣不勝懇迫
祈籲之至

正月十一日
上

言湖廣當增設視師大臣揭帖

題今日發下兵部覆川貴總督李化龍本臣看
詳本內言川貴督撫道將俱已近播彈壓惟湖
廣兵將不齊餉又不備儻致失期咎將誰諉欲
責成湖廣巡撫義在同舟一切軍興悉心料理
俟川貴兵齊之日協同行事不得自分彼此一
節臣惟兵部所言固是常理湖廣巡撫委宜責
成但臣連日與在廷講求湖廣偏橋總兵陳璘
因播亂而特設者也擁重兵三四萬而止令司

道一二人與之共事權輕不足以制之且全楚
遼遠難周而其民輕心易動陵寢重地四達要
區今令巡撫止備西偏移彼駐劄恐其顧彼失
此憂虞不無若兼制彼此為力不專儻酋流突
中原為患更大不如特差一大臣俾監視陳璘
之師既制大兵兼處糧餉事寧與總兵一併裁
革而令巡撫仍駐省城居中調度接濟兵食鎮
安地方似為長便臣輒擬旨上請不敢擅便伏
候 聖明裁定下部院議處施行

正月十三日上

三教程紹揭帖

題近者 皇上批發科臣程紹本處分韓薰斥
之為民臣一時昏愚錯加理會謂 皇上斥紹
為民上揭申救既而省悟前失再揭陳情敢請
明示 聖意以便遵守乃今數日矣不惟臣章
未下即科道官及吏部所上章亦未下使紹進
退惟谷不敢入科科務業積無人辦理則是紹
本無罪 皇上亦未嘗罪紹而由臣之言使紹
自引為罪不敢出也即臣初意本以救紹而不

審不詳一時妄發不幸反涉妬媚之疑何以自
解大臣之義以人事君臣未能招徠薦達以重
朝廷而又蒙此疑萬一上下不信雖欲少效尺
寸其道無由命一刻未下則臣一刻不安搥心
深咎咋舌痛懲實有遑遑不能已者伏乞 皇
上俯垂照鑒罪臣黜臣惟命或諒臣無他而俯
寬之亦惟命若紹則必祈明示淵衷早發明旨
俾令照舊供職庶九重好德之誠洞然四達而
百工熙事之報奮迅咸起臣亦得明其區區留

賢之心過與天下共更而有所濯浹以圖後効

矣

正月十四日
上十八日奉

聖旨程紹屢次煩擾黨護瀆激有旨降斥為民卿
乃再三請救具見敬慎休容姑念係該科程紹着
降一級調外任用韓薰着降雜職邊方用不許朦
朧推陞卿宜安心佐理以副朕惓惓眷倚至意吏
部知道

請補科道并乞假揭帖

題臣昨仰恃 恩私累教程紹伏蒙 聖慈垂

亮寬紹之罪止于降調知 皇上萬分為臣轉

移臣不勝感佩六科止有七人而紹復降出人

益寥寥有廢事之憂伏望 皇上早允行取之

選以備任使幸甚臣舊冬感冒風寒乘春而發

痰涎上攻足軟體乏無以近得家報有親兄病

故哀泣過傷心神恍惚連日未能入直緣在燈

節假內未即瀆聞今尚須調理數日輒以私假

為請伏乞

俯俞不勝感戴之至

二十八年正月十九日上

二十日奉

聖旨覽卿奏謝朕知道了卿兄家逝哀泣過傷未能入直卿宜為國慎攝稍可即出佐理行取之選自有該部院題請何乃諸臣要譽沽名紛紛瀆擾煩激是以延遲非有他故也卿言科務寥寥恐有廢事之憂具見忠愛詳悉便着該部院查有候補起復的分別奏用該衙門知道

乞罷免簡閣臣疏

奏為極陳曠瘼不職虛負 眷知仰祈 聖慈

特賜罷免亟簡賢輔以重政幾事臣迂魯書生
素無遠略 皇上念臣講讀召自田間延之政
府七年于茲矣犬馬猶能戀主葵藿亦自傾陽
臣獨何心而忍言去今天下多事大異曩時悉
臣預政以來身自壞之而身自逃之縱免一時
之靈誅安遑萬世之史罰臣食多鯁鯁徃徃廢
箸而歎夢亦駭愕時時撫牀而起心欲外嘔淚

從中流有不得不哀鳴于 皇上者 皇上躬
堯舜之資而治日建于漢唐之季有君無臣臣
之愚不肖亦大可見矣廷推諸臣無非倍蓰什
伯于臣者而久未簡用天下必且指而詈曰賢
臣之未登以不肖臣一貫在也不知引退而空
自妨途無愧而不知耻莫甚于是此臣之所為
大辱也 祖宗設官自府部至郡邑孰無副貳
而內閣重寄尤備其人非徒藉其寅恭亦以防
夫專擅臣何人斯而獨久此即專擅大戒凜凜

自誓而負乘有日積愆必多雖無其心已有其
跡疑端所生危機所伏此又臣之大恐也夫千
金之裘非一狐之腋大廈之棟非一木之枝臣
昔與二三同官交相麗澤尚不免于謬訛廼今
左顧右盼莫咨莫詢即欲問諸所司而辰入酉
出日亦不足職掌異任接見無由以孤臣之矇
瞽應萬幾之紛沓一目而南北視一足而東西
驚其何能給諺云獨樹不林則臣之謂矣蕭曹
丙魏房杜姚宋之賢猶相輔仗以有成也今濟

濟諸賢悉置不用而獨畀一不肖之臣臣不知
皇上何為而忍此且美錦之裁不付于學製美
玉之琢必待于良工初入閣時島氛雖未淨而
海內猶謐如也今奏牘紛紛無非愁嘆焉用彼
相誰生厲階德薄位尊公餽將覆語云小犢僨
車臣之謂矣昔司馬相而中國重李綱入而朝
廷成閣臣失職豈獨臣憂抑社稷之憂 皇上
之憂也臣之肉不足食而 皇上之天下寧堪
一再壞乎何為而久不念此夫臣之事君猶子

事父義無求去之理去亦將何歸第臣留一日
增一日之罪留一月增一日之罪非徒無益不
免于害留之無庸則去恨晚矣伏乞 皇上于
廷推諸賢急點數員入閣辦事放臣歸田俾賢
不肖各得其分臣情迫辭慙干冒 宸嚴無任

戰慄隕越之至

正月二十五日上
二十七日奉

聖旨朕前覽卿奏已諭卿為國慎攝暫假數日今
何又有此奏朕心甚為惻然方今國步艱難眷倚
方殷豈可堅辭求去宜遵前旨加意調理稍可即

入輔政所請閣員情詞懇切便着該部通將前推員數開具來用吏部知道

再催補閣揭帖

題臣近日慘惓家難哀泣過深傷損心肺二經
因感痰嗽怔忡等疾舊恙并作終宵不眠飲食
日減醫藥罔効久稽入閣之日滋多曠官之憂
幸蒙 聖恩賜假從寬尚有容身之地又蒙 允
臣請添閣臣之疏宣取廷推職名恭俟 簡命
以刺為年而于茲數日尚未聞 命則臣積誠
之懇又似成虛而不能回天矣薄命至此能無
自傷 皇上一舉筆之間即可登進群賢增闕

治理免臣專擅之罪寬臣拮据之勞而何為深
靳乎臣口不能言身罔攸措時時吟嘯獨語與
喪魂失志之人無異萬不得已冒死再請伏乞
少垂頃刻將吏部疏內諸臣 賜簡數員入閣
辦事若眷注舊臣不忘起用亦乞傳示 聖意
差官驛召庶賢才聚會政幾無曠而臣免于妨
賢誤國之罪矣思涸情迷涕泣不知所云

二月初二

上日

回處魏巡撫揭帖

題伏蒙 發下魏允貞告終養本傳旨准去令
臣擬票臣宜恭遵但思巡撫係一方重臣留則
可留去則必于吏部覆本之內票去有難竟放
臣謹照舊擬下吏部俟部覆至日伏候 聖裁
傳示施行

二月初四日上

是時魏持稅使孫朝急朝屢譖之吾特保
全魏以抗朝也 上為之留中

請舉典禮揭帖

題臣前次揭帖言人臣愛君甚者諫之必于無
人之所蓋心膂之言密勿之議無沽名干譽之
心皆愛君體國之實則其納誨必如此矣是
以明聖之主每感而思思而採也臣再以一
言進惟不以為瀆而俯採之臣惟天下有必
不可已之事有必不可緩之時時至則事起當
乘時舉事不當因人之激而更生厭棄之心事
至則言多當據理酌言不當因已厭聞而并置

當行之事古之聖賢豈無事與心違紛紜膠牒
不如其願者乎又豈無言與心違抵諱觸忌不
堪聽聞者乎雖大聖上賢諒有躁煩愴忿之情
與人同矣獨計天下事當與天下人公之宜行
宜止自有定衡而非一己能行止宜遲宜速自
有定期而非一己能遲速於是平其躁心靜其
煩慮破先入之見祛旁出之情意雖不得徐而
度之以理已雖不快勉而抑之以人長懷却顧
熟思審處要於當而後已此聖賢所以善成天

下之事也何則必有忍乃能有濟小不忍則亂
大謀幾微之不制而天下國家之患將叢故聖
賢慎之也今 皇長子典禮一事大小臣工奏
牘日上臣誠慮之言多則聽必厭聽厭則心必
煩雖天海包涵必有不快者矣然使事稍可已
姑已何傷而此則萬萬不可已之事使時尚可
遲姑遲何害而此又萬萬不可遲之時諸臣言
之豈不自知其激聒彼亦萬萬不得已而言也
皇上于此亦萬萬不可因言而厭因厭而置矣

臣虔虔致禱願 皇上葆和養中澄虛觀理盡
融成心兼除意氣固不必徇物亦不必拒物以
天自處以道自御上揆 祖宗之曩典下念父
子之至情近察朝野之輿心遠維宗社之永計
聰明睿智之聖通天徹地之明一裁度間諒有
洞然而無疑惻然而心動者向也諸臣未言而
皇上特諭所司舉行今臣下之所請特述 皇
上之言耳非有所增加也 皇長子年十九矣
去冬喜事臨近之 旨衆所歡承言猶在耳此

而不冊立不冠婚終當何時舉行作何究竟總
之必不可遲之事不可付之罔聞也臣仰勸
皇上無厭聒擾迎和導祥早發 明旨令禮部
擇日舉行以定國本以安人心惟幸原而俯允
之臣不勝力疾哀籲

二月初七日
上初十日奉

諭次輔朕覽卿奏揭悉見忠愛至意朕怒其煩擾
離間不體上心頻數聒激且事體隆重屢旨明白
所奏已知道了

言時事揭帖

臣舊年秋冬間見年穀不登物價翔貴民心嗟
怨流言數興心恒懷憂謂必有盜賊竊發之虞
屢次上揭乞皇上敷仁政以收民心減征求
以養民財既蒙省納而臣又每與所司商求
賑借恤濟之方詰捕防閑之具不敢少懈今輦
轂之下雖獲安全畿輔之間掠刼不少至于赤
地千里草木都盡死殍載道商旅不行殊可憐
也殊可憂也近聞徐州上下有盜糾衆倡亂不

勝驚駭日夜靡遑訪求消息今日傳聞徐州兵
備郭光復設法擒拏首惡孟化鯨等二十餘人
明示脇從黨與准其出首免罪一時人心稍已
寧帖但有元兇趙古元先已出游不知向往深
為可慮此宜亟行各處多方懸購以絕禍源者
也臣惟天下之亂常起于盜賊盜賊不除而至
于蔓延則救之不勝其救矣山東河南乃天下
腹心之地豪傑迭興之所近來白蓮羅道之教
盛行妖言邪謀所在布滿談兵說劍嗔目語難

因見朝政之有非借為煽惑之口實又乘民心之思亂遂興不軌之邪謀幸賴祖宗在天之靈皇上無疆之福及其未發一舉撲擒而巨魁猶在禍本未除安知死灰無復燃之勢此又各省直之臣所當同心密訪者除臣與諸臣竭力申飭鼓舞外謹先奏聞更祈皇上推廣至仁以保愛黎元敷求大道以計安國本脩初御蕩平之王道停比年權宜之近圖臣舊年又曾請皇上多收練時務識兵機者置之京師

及近畿地方以備不虞此誠急務乃遼東又缺
巡撫矣最難得人豈無可用之才正以在遠難
待如臣閣中尤宜早簡以備顧問以立政本臣
非為身謀實為國謀大抵處置萬幾以得人
圖治為要凡吏部推舉本章早賜允發庶幾群
賢畢集衆績可熙也

二月初九日上

再催補閣臣疏

奏為候簡閣臣日久未奉明綸力盡意危竭哀
復懇并乞 俯容休致以免曠愆事臣惟誠有
鬱于中而不得達則鳴力有乏于用而不得休
則求誠大鬱而至于竭力大乏而至于憊則其
鳴與求不得不哀然惟當其時肩其任迫於水
火而不能逃者其哀鳴哀求最切從旁而視雖
或憐之不能與之同也 皇上以閣事獨付于
臣如臣之力足以瞻舉方當詫遭逢之甚竒喜

左右之無掣惟恐人之分也又何大聲疾呼于
九閤之前請益而不已不懼罪乎顧獨任所以
榮臣也而臣之所最苦此獨也獨思則不用獨
決則不衷獨聽則不徹獨察則不明獨處既久
而莫聞規導之言日淪于面牆之愚善有所不
及收過有所不及更或以心力不繼而略或以
目力不足而弛明知其宜然而鹵莽者不少至
于所不知者又何可勝道也 皇上幸寬臣謂
可備員耳天下方憐臣偶未彈糾耳而臣以隻

影汙玉堂之署歲有六月前此已誤豈庸再誤
日愈多罪愈積而懼愈甚何能畧刺安乎胡可
謂閣中有人而不廣求贊襄此何地也而令單
弱空虛至此極也有大物于此使數人共舉之
則不勞而行其力分其知間其于事周以詳故
也缺一人焉餘人必告勞矣盡去其餘人而責
于一人豈惟不能舉且告壞矣抑此猶事也臣
請更言食有食于此本以饌數人也而獨責一
人兼之其人有醉飽以斃耳夫食尚不可兼也

而況于事又況天下之大事乎然則臣之所苦
亦可喻矣臣嘗聞之人主之道與人臣異人主
之權不可以不專而人臣不可以專故天下之
所歸者一君而君之所任者非一臣若使君之
所任者惟一臣則群賢不得進矣得亦此一臣
失亦此一臣所得必不能如所失多百官必且
無表兆民必且無望四夷盜賊必且無忌憚矣
今以臣之不才孰如衆臣之才多以臣之不肖
孰如衆臣之肖多以臣為才為肖而獨任之是

謂天下鮮任臣也四夷盜賊寧不輕朝廷無
人而薄中國為易與乎何則國有輔臣猶家之
有督幹也家無督幹而盜有不決其藩窺其戶
者乎傳曰不信仁賢則國空虛此猶謂無仁賢
也非無人也今并其人而無之三尺童子知其
空虛思盜之矣且臣愚不識皇上之所以屢
推而未簡者何也事有妨于舉而言有妨于聽
姑且置之猶有說也若簡閣臣惟聖心之所
嚮何所妨于國乎便于時而固持若此也如臣

不肖則于國誠妨于時誠不便而又衰老疾病顛連困乏至于今之極 皇上因循而不俞其去何也臣之此請蓋兩歲之間無月不有而比日遂以乞身讓位揭請隨之復束之高閣矣豈臣之所以瀝懇者猶有遺義乎雖欲追煩瀆之愆烏可得已且臣之不敢獨擅亦區區之赤忠也不敢久妨亦惓惓之少效也非獨投老求閒為自便之計而已也伏望大濟恩慈少垂憐憫早賜黜用新推俾令入閣辦事而放臣歸山以

彰蓋帷之義生當啣環死當結草

二月初九日上奉

聖旨朕覽卿奏屢簡閣員情詞懇切引喻更深具見忠愛敬慎誠可嘉尚已知道了卿告請日久政本空虛朕心朝夕懸望卿宜亟入贊襄以副眷倚至意所辭不允吏部知道

回諭札揭帖

題初七日臣因 皇長子典禮具揭上請今日

談文書官張文元恭捧 聖諭到臣寓所 諭

次輔朕覽卿奏揭悉見忠愛至意朕怒其煩擾
離間不體上心頻數括激且事體隆重屢旨明
白所奏已知道了欽此臣力疾叩頭恭接莊誦
不勝慶幸不勝感激 皇上天性至親仁同天
地屢旨明白昭如日星佇當煥發恩綸嘉成典
禮臣先承優荅洞悉淵微其為踴躍比恒萬倍

若諸臣者其煩擾誠有之而離間決不敢更祈
聖明容納特示吉期庶使衆心皆安而群口盡
息也所奉 聖諭謹尊藏閣中以傳永久臣謹

具回奏

二月初
十日上

入直揭帖

題臣正月間因長兄有訃不勝手足痛楚于本月二十一日具揭乞假少申家庭綰奠之禮伏蒙聖慈俯賜俞允隨因感傷致疾幸獲小愈謹于今十五日廷見謝恩入閣辦事訖

二月十五日上

言陳奉揭帖

題蒙發湖廣稅監陳奉一本內因楚中地方屢
行鼓噪奏稱守臣朋謀逆 旨事下臣擬票臣
惟陳奉係御前差官臣子敬事 至尊即宜推
及 至尊所差之人禮也各官私多公少臣不
能保其無 嚴旨切責亦不為過但臣反覆看
詳上年十二月武昌既有一變以後漢口又是
一事黃州又是一事襄陽府光化縣又是一事
青山鎮陽邏鎮又是一事武昌縣仙桃鎮又是

一事寶慶府又是一事德安府又是一事湘潭縣又是一事巴河鎮又是一事民變連起如此之多則楚中幾無完土處處人皆不靖矣夫元元萬姓孰不願樂生于聖世者何為敢與至尊之命使抗哉蓋其情急事危雖至尊之命使不暇顧矣至尊之命使尚不暇顧彼干一二有司又何能顧而能聽其禁戢乎竊詳陳奉之意亦無可奈何而姑卸罪于有司耳蓋礦稅二事實非民之所欲奉在地方實非民之所喜

奉即欲與民相安而不可得其身實孤其跡實
危淋漓苦楚非虛言也何也奉命征收其職也
急征則歛怨于兆民森森瓦石之間無所置身
矣缺征則得罪于 皇上赫赫嚴旨之下身亦
齏粉矣即使今日苟安豈保他日無事地方倘
一搖動激變之罪何逃故不得不預鳴以為倖
免計耳臣愚以為民情一變亦當致儆而況于
屢變既已屢變而又窮治亂黨深督有司則民
益無所恃而變益愈急不惟無裨于稅事抑且

速害于地方今楚中方征楊首家增賊處處
添兵而又以此迫之適驅之使從賊耳誠非善
計臣愚懇勸 皇上發仁言仁政以收楚民之
心上策也不然將此本留中而另發 密旨令
奉從寬行事中策也必嚴督之則楚民素稱悍
暴而楚地又甚遼遠深山大澤易藏亡命盜賊
一行嘯聚楊首更難收拾而中原之事多矣昔
高皇帝時陳友諒以楚中兵與我大戰數十鄱
陽之役御舟為大礮擊碎 聖躬幾危而後勝

之 皇上宜思 聖祖之創業如此艱難而今
日守成誠非容易毋謂楚民可忽也臣久懷憂
慮輒此布聞所有 聖旨未敢輕票惟俟 聖
裁施行臣之所恃者 皇上也 皇上若不諒
臣之赤心臣何所恃臣若不以赤心事 皇上
臣又何為臣為國大事懇懇瀝忠

二月十六日上

催發引奏本揭帖

題昨日刑部侍郎謝杰董裕咸來會臣言本部
尚書蕭大亨一品三年考滿吏部查理已明引
奏復職本未蒙發大亨不敢入部而侍郎又不
敢代庖一應出入公文停閣十餘日矣臣聞此
言輒自警省豈皇上謂臣票擬有未當而留
中乎臣請明之本月初四日蒙發票時臣查舊
規部院正官考滿加恩如太子少保戶部尚書
楊俊民陞太子太保都御史衷貞吉陞太子少

保皆就于引奏本內票陞例也今臣獨領閣務
恐不周詳又嫌專擅故不敢即擬而下部查例
以明臣敬慎不專之義應與應否該部必不差
錯儻謂臣越例市交則萬萬不敢伏祈 聖明
鑒察早將吏部引奏本 乾斷批發准令大亨
復職庶使刑篆有歸而政務無廢其恩典出自
朝廷恭候 聖明欽定以昭優禮大臣之意

十五日
上

西典禮諭札揭帖

題今日文書官趙金恭捧 聖諭到閣諭內閣
朕仰承 天眷 祖德賜生元子暨諸皇子前
屢旨明白去歲以來卿等數揭上請朕以其元
子冊立冠婚之禮重典且原所居之宮狹小已
着該監將慈慶宮葺飾以備移居昨該監奏已
工完茲大典可挨次舉行其分封諸王悉照前
旨行卿等宜體朕意撰勅諭禮部擇日具儀來
聞還示諸官不得又來煩阻欽此臣不勝踴躍

忻忭當即舞蹈叩頭欽遵附奏外臣惟 皇長
子冊立冠婚諸皇子分封諸王 天地 祖宗
屬意已久 皇上斷自 聖心親灑宸翰諭臣
等撰勅舉行仰見 皇上至聖至神有典有則
慰 廟社 慈宮之望延子孫萬億之休荅華
夷臣民之心錫宇宙綿長之福此普天同慶率
土齊歡無不敬祝 皇上萬萬歲壽者也容臣
即會首輔志臯同撰勅諭上進其慈慶宮既改
為元子之宮舊懸扁額悉當更定容臣等擬名

上請諸王分封遵奉前旨亦宜即行冠禮容臣
等傳示該部臣再惟 皇上此舉承 天意以
弘 祖德至敬也建元良以定國本至仁也明
長幼以廣藩衛至公也順群情以寧海宇至恩
也凡在臣民無不思服豈復敢有煩阻者乎昨
小臣無知妄行賂瀆誠所謂螻蟻微物不知天
地之高深者也伏惟 皇上廣度弘包順神養
性臣不勝惓惓已即欽遵傳示該部令諸官恭
體 聖心不得又來煩阻外其 勅旨尊藏閣

中以傳因極

三月二十
六日上

御批朕覽卿奏具見忠愛敬慎但昨日畜物之疏
朕知出位效顰沽名要挾已置之不覽姑從寬處
了今卿奏勸朕始知之況此大典前有屢旨明白
實乃斷自朕心豈可聽其無知小人乘機聒瀆哉
卿宜仰體朕意傳示大小群臣知悉

擬上典禮勅諭揭帖

題伏奉

聖諭

云

欽此

臣等

不勝

慶忭

謹欽

遵擬上

聖諭

云

道恭進

伏望

皇上

親賜

裁

定施行

皇帝

勅諭

禮部

朕仰承

皇天

眷恩

祖宗

慶祐

賜生

元子

暨諸

皇子

體奉

聖母

訓屢

有諭

旨申

明朕

以元

子冊

立冠

婚典

禮重

大且

原居

之宮

狹小

今將

慈慶

宮葺

完以

備移

居冊

立冠

婚次

第舉

行其

皇三

子皇

五子

皇六

子皇

七子

併加

冠分

封爾

部便

擇日

具儀

來

敬事亭

卷七

欽哉故諭

三月二十
六日上

催發典禮勅諭揭帖

題前二十六日恭奉 聖諭朕仰 天眷 祖

德賜生元子暨諸皇子前屢旨明白去歲以來
卿等數揭上請朕以其元子冊立冠婚之禮重
典且原所居之宮狹小以着該監將慈慶宮葺
飾以備移居昨該監奏已工完茲大典可挨次
舉行其分封諸王悉照前旨行卿等宜體朕意
撰勅諭禮部擇日具儀來聞還示諸官不得又
來煩阻欽此臣等不勝欣忭隨查舊典擬勅進

呈至今旬日未蒙 允發在朝臣工接踵來問
或責臣等撰述稽遲致成擔閣或疑臣等擬議
未當有煩 聖裁臣等告以即日擬進並未稽
留但學識疎淺容有未當然累朝典章具在已
曾參考 聖諭又極詳明不必潤色若夫儀注
條目自應部題竊揆 聖明旦晚定發又謂首
夏清和成禮甚便竭誠敦請責在輔臣臣等又
謂 天性至親 聖心尤切宸衷獨斷金石不
移且 皇上方令各官無復煩阻而臣一貫已

曾再三面與滿朝言之矣宜當靜聽 德音不
遠或又謂冊立大典舊規原該文武百官頻章
奉勸令 聖意獨斷四海皆知累朝舊規似亦
難緩此言則臣等頗以為然而亦未敢許也因
此密揭上請望 皇上早將勅書欽定傳發以
昭始終獨斷之意以免群臣勸請之煩且 皇
三子今齡十五諸皇子皆漸長成冠婚諸典接
續當舉前者有阻則後來必妨前既通行則後
亦無碍庶幾庭帷長幼之和氣充溢而社稷宗

廟之禋福無窮也臣等忝備股肱義關休戚撰
發勅書又係職掌謹齋沐同心具茲披瀝緣係
事幾不欲外洩臣一貫謹勉強手書潦草殊甚

更祈聖慈矜宥

四月初五日
上初七日奉

御札諭內閣 祖宗制度國家典禮朕審時察理
裁奪奉行昨以慈慶宮修葺完備皇長子暨諸皇
子冊立分封冠婚大典已諭卿等撰勅挨次舉行
偶有畜物謝廷讚乘機出位要功朕因惡其狂妄
以致少待使天下臣民曉然出自朕心斷定不惑

於奸小之聒瀆也今覽卿等奏揭具見忠慎詳悉
已知道乎卿等可傳示諸司靜俟移居畢即發勅
行矣不得逞臆又來聒阻特此諭知

回諭札揭帖

題今日文書官并登捧到 御札諭內閣 祖

宗制度國家典禮朕審時察理裁奪奉行昨以
惠慶宮修葺完備皇長子暨諸皇子冊立分封
婚禮大典已諭卿等撰勅挨次舉行偶有畜物
謝廷讚乘機出位要功朕因惡其狂妄以致少
待使天下臣民曉然出自朕心斷定不惑於奸
小之賂瀆也今覽卿等奏揭具見忠慎詳悉已
知道了卿等可傳示諸司靜俟移居畢即發勅

行矣不得逞臆又來聒阻特此諭知欽此臣恭
繹 聖謨不勝喜躍仰惟大典定自宸衷乃

皇上奉 天法 祖之至誠建極明倫之盛舉

操柄未嘗移于下議論未嘗採于人屢旨甚明

臣民久喻昨奉諭旨謂修葺慈慶宮以備皇長
子移居已見 聖慈真切聖慮周詳今又奉諭

謂移居畢即發勅行尤見時日不遠益宜靜聽
大小臣工寧復敢有狂逞腹臆以滋聒瀆者乎
臣一貫在閣辦事職當奉行已即傳示首輔及

該部科令百官恪加遵奉外其慈慶移居當擇
吉日伏想 聖明留意所奉 御札謹尊藏閣

中以昭謨訓于萬世

四月初
七日上

催發吏部陞官本揭帖

題昨日吏部堂上官來會臣言本部推陞本已
上數日未蒙 允發欲臣具揭催請蓋舊規推
陞過後方因此缺可以大選今未允發則于大
選實有妨碍事非得已輒為代奏伏乞 皇上
早賜發票以通銓法

十四月二
日上

封還張忠議鹽本揭帖

題蒙發山西礦課太監張忠一本為鹽議已定
鹽課未定仰遵 明旨酌議鹽價懇祈 聖裁
永著成令事令臣擬票臣惟各處上本例有揭
帖致閣臣得預為講究尚多下部使堂司各盡
所長查例題覆然後臣從而據理擬票此舊規
也惟欽差內臣並無一揭到臣無由知其源委
張忠所奏又為鹽事國儲邊計關係非輕數千
餘言倉卒難解臣實愚昧不敢妄擬况欲酌議

鹽價永著成令豈臣一時片言所可輕預乞
臣所擬下部看詳必有以仰副聖心者惟聖

慈俯亮

五月初
六日上

催發吏部堂官引咎本揭帖

題臣惟國家設官分職各有攸司夙夜在公尚恐職務不舉豈有一衙門官至于半月之久而通不辦事之理又况吏部乃百司之長諸職之統尤為緊要而可以廢曹乎臣連日聞吏部尚書李戴等因科臣李應策叅論趙壽祖蕭大亨而波及其司官因上疏引愆閉門竢命自前月二十六日至今已十四日矣詳李應策之疏不過譏評司官於堂官無預而堂官深自引咎是

亦其小心敬慎之一端也人臣之道禮當如此
聖心明見諒不深求然未省發則彼一衙門大
小官員皆逡巡不敢視事矣遂使投文領文員
役日以百數莫不稽誤出入下部本章日以十
數莫不稽誤題行各處緊要缺官至有關係軍
機者無從擬議上請其為妨廢尤非細故前日
都御史溫純特來會臣昨又移書于臣欲臣揭
請臣職在股肱不敢坐視伏乞皇上將吏部
前本早賜批發令其即出供事庶百僚有所統

率諸政有所振舉此合朝之心非特臣與溫純
二人之意也伏候 勅旨

四月初九日上

言孫朝叅魏允貞事揭帖

題臣惟今日政體有一時之低昂而關當代之
治亂不無大煩 皇上之主持者則孫朝魏允
貞之事也我 祖宗斟酌百王立綱陳紀詳審
精密防患最深如設官分職布列中外內則閣
部院司以至臺省百僚外則都布按司以至府
縣各屬靡不相兼相制糾結維持有一官必有
數衙門為之統轄有一事必有數耳目為之經
承一口不敢獨決一手不敢獨裁一足不敢獨

行一心不敢獨制故當其任者雖似有掣肘之苦而事精物詳法行政肅規摹廣大體統公平君子有所依憑以效其忠小人有所忌憚以斂其惡國家二百年来太平無事者以此凡人臣之老于世故久于仕途者莫不抑心戢志以為宜然而不敢有所屑越惟敢作敢為不知事體之人則忿其拘束而思決裂之此甚不可許者也一有偏信獨任則勢重于極而難轉毒鍾于隱而難治矣憂患之來豈淺淺乎如巡撫一官

祖宗所特遣以肅憲于一方者也於是雖無所
不統而錢糧制于布政獄訟典于按察各差巡
按又頡頏于一時未嘗不寓相制之意焉故足
倚信也惟今礦稅內臣則體統不載于憲綱職
守不著于會典欲行即行欲止即止欲叅論即
叅論欲罪罰即罪罰使中外臣僚不得寓一毫
相制之微意而盡廢祖宗之良法竊以為假
之太過矣非惟憲臣不能制也且反制憲臣亂
是用長屢奉 皇上嚴諭豈不望其會同和衷

而撫臣以安民為務中使以搜民為務職事既已相反調停何處得施理所難通必不能盈其欲法所難假必不能快其私水火異心終無聚會臣久已憂其有今日之紛紛矣夫祖宗久設之官經制也皇上暫遣之使權宜也以權宜而妨經制非久安長治之道也朝廷之所以尊而國家之所以安者惟恃此體統法度撫臣必不可廢而徇內臣內臣豈可縱而參撫臣撫臣可參又何有于按臣又何有于司道而又何

有于府縣盡魚肉之矣軍民何所恃以為安乎
如此則百僚撫綏之計窮而四海更生之望絕
內外低昂陰陽消長于此乎決 皇上不可無
主張于其間也且臣聞之醫之用藥必使之相
畏而相使然後得其用用人亦然使之相畏然
後各懷小心而不至于廢法使之相使然後其
舉職守而不至于廢事且兩重其人縱有一人
壞之而尚有一人救之可無意外之虞既已相
畏必復相制皆莫敢自為用而盡為朝廷用此

明主用人之術也今日之事即不能伸此抑彼
以為撫臣重猶當兩存而兩制之使形跡渾成
無所測 皇上之喜怒官府一體無所竊 皇
上之威權庶幾國紀無虧而民心無失也臣為
宗社計久遠以效忠于心腹之前敢不危慮極

思

五月十六日上

謝考滿賜鈔錠羊酒疏

奏為恭謝天恩事臣以一品三年考滿伏蒙

聖恩遣御前牌子李虎賜臣原封鈔二千貫羊
一隻酒十瓶齎捧到臣私寓臣謹焚香叩頭祇
領訖伏念臣性資薄劣才術疎庸猥蒙特達之
知謬辱贊襄之寄優游一品荏苒三年民有化
離蓋鮮阜安之策國多氛沴曾無燮理之方未
遑逃祿以歸耕長愧尸居而素飽會茲考績顯
族黜幽乃荷聖慈更隆晉錫追靈誅而存舊

尚書
卷十
拜駢貺以轉新寶鏐累千分重珎于御府牲醪
維旅流溫玉於天庖恩自中來益從外至念支
離之已久憂責方深承拂拭之過勤感銜彌甚
何以仰酬天地誓惟俯竭股肱以飲冰食蘖自
將少圖尺寸第補袞調羹無術終負高深臣不
勝頂戴感切之至除報名廷謝外謹具奏謝月

二十
日上

言隴澄宜賞揭帖

題今日蒙發兵部覆兵科本為黔師報捷減賊
有期諸路未齊糧餉不繼懇乞 嚴旨急集兵
糧議殊賞以收全勝事除督兵催餉等情臣已
票擬外其欽賞隴澄一節臣查得隴澄係鎮雄
府土知府原名安堯臣即貴州宣慰安疆臣親
弟同母鳳氏所出也年方十七歲見領兵征播
蓋楊應龍與安疆臣接界聲勢相倚往來相通
以為疆臣必當助已又料前巡撫江東之叅論

疆臣疆臣必不為朝廷用故敢乘機跳梁而不知皇上已正江東之之罪收安疆臣之心近又有旨備言朝廷推誠布公賞罰明信微功必錄豈負忠義之臣令疆臣奮忠討逆奉公滅私進兵報効毋生疑阻該督撫宣諭與知故鳳氏踴躍受命而傾心于國家矣初安兵直入大水田去逆巢止十里此時安氏頭目尚有暗與播通者三月二十九日楊酋嚴安營隴澄持鎗督陣大戰殺其頭目五十餘人斬級近萬殲其第

四子楊惟棟而安兵亦多損傷隴澄即將中間
隱情言于其母兄之前疆臣遂傳令殺其目把
羅鎮而鳳氏掃土起兵把盞送二子徧傳酒于
各目復於四月十一日進兵近今又報隴澄計
哄楊酋招其頭目尚義黃繼枝來營議撫賊果
具降文備禮物遣尚義等二十四人來皆擒送
貴州矣尚義等係賊親信腹心軍門懸賞以指
揮募之者也今既被擒則賊勢益窮而安氏之
實心益見故該科引朝鮮蔚山例請先賞隴兵

若干金該部議覆止賞隴澄一人金幣蓋將結
安氏忠義之心而絕楊酋交通之望且鼓漢土
諸將觀望之意所裨不細也臣謹票擬并詳始
末以聞伏惟 聖明裁允

五月二十
一日上

言征播功狀揭帖

題臣今日在閣接得川湖貴州總督李化龍征
播揭帖書札言王師八路進剿賊難應援亦難
防守故只集兵關內以俟大戰三月二十九日
戰水西安氏兵四月初三日戰我綦江兵此二
枝兵在八路中稱最勁者然皆先敗而後能勝
之可見賊本勍敵未易與也安氏損兵千餘大
頭目柯阿箇之二子俱傷但土司耻敗不盡報
耳初四日以後戰我合江兵連戰二日不分勝

負至初七日投文詐降總兵吳廣亦詐應之而嚴備以待初八日捲土來戰廣力戰敗之初十日賊集其衆苗而誓之曰爾等不為我盡力我今上固任官兵殺爾衆苗曰合江手硬綦江銳狠委實難敵明日當敵南川至十一日詐降我南川十二日劫營先已審知而伏兵以待之復敗而去於是父子相哭而上海龍國十六日川兵四路始會而約期十七日南川兵先至固下各有殺傷日暮據其關十八日綦江合江兵俱

至盡掃其國下周圍之小國苗兵有殺者有散
者有去而投安氏者今國下已無苗賊惟有保
國苗而已其黨田一鵬等五十一人謀為內變
已領高推官執照內一人漏泄賊盡殺其妻子
事遂不成然自此腹心盡潰父子相疑四面攻
之不自焚即當為人所執不能逃矣右李化龍
之言如此臣不勝欣忭此賊旦晚可殲以寬
皇上西南之憂但地方殘破已甚所宜極力撫
摩官兵會集甚多所宜破格酬賞况聚兵非難

尚書 卷一
散兵為難善始非難善終為難官帑既空民財
又罄上下告急凡事掣肘所以汲汲為之計者
臣與部院憂責尚殷敢不竭力尤祈加意惠綏
勵精振飭賞罰並舉恩威互行如天地秋殺之
後繼以春生使臣下有所奉行億兆有所倚命
也臣撮其略節以便

聖覽

五月二十四日上

辭考績加恩第一疏

奏為考課無功隆恩難冒懇乞 聖明特允辭
免以安愚分事臣以一品三年考滿該吏部題
奉 聖旨沈一貫簡任密勿匡贊忠勤茲一品
滿考勞績茂著著加少保改吏部尚書餘官照
舊廕一子與做書舍人給與應得誥命還賞
麒麟胞背服一襲欽此臣捧誦 恩綸不勝惶
悚除麒麟胞背服臣不敢固辭容拜賜廷謝外
竊惟考課之法總三年功過之實以行一時黜

陟之權勸懲攸存風勵斯遠載在令甲為法甚
嚴况閣臣乃九重之倚毗庶府之瞻矚稱職則
天下蒙其福曠職則天下被其害功過視諸臣
尤大而黜陟比諸臣更嚴也臣自忝竊以來優
游送日燮理無絲毫之益經綸罔一線之長愆
尤叢生罪垢山積下慚所學上負 聖朝正當
及此省成明示幽黜 皇上寬其厚釁錄其微
勞特詔所司復其故處斯則如天之聖德甚弘
而溝澮之臣涯已溢矣何復詢不可循之故典

而假非所望之誤恩晉崇秩于三孤超先諸老
轉我銜于首部統率百僚追寵其先人延賞其
後嗣宜黜而陟文過為功甚非所以貽愚臣以
安而昭至公之典也臣聞明主之敷恩也匪日
是計惟功是計今臣計日雖三年之滿而程功
無一字之裨老悖多昏自知猶審既已隳職而
壞身矣雖欲名之為積資養望亦不可既已殃
民而蠹國矣雖欲名之為伴食充位亦不可蓋
易大傳云德薄而位尊知小而謀大力小而任

重鮮不仆矣臣德薄不能強而厚也知微不能強而多也力小不能強而大也顧不能自強而猶能自量如屠羊說之辭為三旌庶幾亦可復不自量則螾蚩斃于多取螳螂靡於敢當必無幸矣伏望 皇上察臣悃誠毫無矯飾收臣新命俾緩顛隳如欲策勵其將來姑令率循夫舊貫仍乞博採賢碩共圖政幾臣敢不竭盡狗馬

銜結環草

五月二十四日
上二十六日奉

聖旨卿碩德重臣勲勞茂著考績加恩原係彛典

臣體朕眷懷恪遵成命不允辭吏部知道

辭考績加恩第二疏

奏為再瀝悃誠懇辭誤渥以少釋慚負事臣頃
以一品三年考滿濫被隆恩具疏辭免奉

聖旨卿碩德重臣勲勞茂著考績加恩原係彞典
宜體朕眷懷恪遵成命不允辭吏部知道欽此
仰惟 聖眷優崇恩綸稠疊感激涕泗誼當勉
承但臣反覆思維實增慚懼若芒刺之集於背
而叢棘之寘於身也心之神明已不自許敢不
再三披陳伏祈憐察臣嘗聞伊尹有曰一夫不

獲時予之辜又嘗聞程顥有曰一命之士苟存
心於愛物於人必有所濟臣幼服斯言壯欲行
之老而無成有不能頃刻寧矣蓋緣克己未盡
忘身不真雖懷捧日之忱竟抱書空之悔經年
姑待於時何所短長逐節支持於世焉能輕重
見義無必為之勇懷情有不盡之嫌以祖宗
二百年泰寧天下而脊脊多事自臣獨事始然
則人之不獲豈止一夫撻市之羞又將誰諉求
去不得祈死不能不得已而托之於程顥之言

以為苟有濟于分毫亦庶酬夫萬一也然而燎
原焚之勺水救之曾所餘之幾何福輕於羽禍
重於地雖至愚亦知辨况臣有天下之任者也
非一命之士也安得妄援而自解乎以故視日
如年覩寵若辱首尾狼狽魂魄分張不敢覬祖
帳之榮不敢希蓋帷之厚但得賜歸田里詠歌
太平臣之願也亦臣之幸也比當考課意極逡
巡聞閣中有前輔臣王錫爵不報滿故事竊欲
倣之而或以為非制又復覲顏過部矣夫爵賞

朝廷礪世之具也臣豈敢逃之遭逢聖賢用世之資也臣豈不願之顧用以褒德而德涼用以報功而功蔑前人際亨履泰彰賜所以著恭今臣業釁積愆冒恩所為滋罪且閣臣缺員久矣皇上甚靳簡用而專意於臣皇上所以望臣者蓋倍而臣之所以負皇上者亦倍見恩難報見職難供晚節未知後功莫料日復一日危而又危加之官高其危彌甚伏望皇上察臣固避悉由悃誠心相體亮而義相成就特准辭

免新命俾仍舊官策勵辦事都俞之朝寧需進

秩不勝激切懇誠敦請之至

五月二十七日
上二十九日奉

聖旨覽卿再辭恩命具見忠懇考績舊典原非過
分豈宜固遜還遵成命以慰眷懷所辭不允吏部
知道

拜命并請添閣臣揭帖

題臣行能無取奉職多愆昨以考滿蒙恩超踰
過甚不勝惴慄再瀝辭免 聖眷特厚溫綸渚
領臣拜受誠慙控遠似瀆謹已祇領于今日報
名廷謝外但念臣壯不如人老尤無用繆當揆
路復晉孤卿輕塵何增岱華之高涓滴何益溟
渤之大况夙病纏糾新疴輳增不惟力倦筋衰
抑且智昏神困誠恐辜負恩造罪戾滋多么麼
隻身萬死奚益輒恃寵眷因披禱求伏乞 皇

上垂念政本不可久虛孱愚不可獨任親發藻
鑑簡用忠賢庶幾贊襄多而政事理朝廷重而
海宇安也臣不勝感激天恩之至謹具題恭謝

並申懇

六月初
一日上

請留蕭大亨陞李應策揭帖

題今日蒙發刑部尚書蕭大亨告病一本令臣
票擬臣查得蕭大亨前經告病擬留未發近以
一品三年考滿蒙恩復職繼因科臣李應策論
趙壽祖而波及本官大臣之義引咎求去彼自
為名節計也顧本官典刑署兵心力俱瘁姑無
論功而勞亦可錄通考非過已蒙 聖明洞鑑
則今告病之疏宜蒙 聖慈慰留刑獄事繁杜
門非禮伏乞批發以隆大臣之體以慰在廷之

心臣不勝惓惓再照李應策舉發趙壽祖私書
公正可嘉已蒙 聖恩紀錄聞應策曾經吏部
推陞京堂近今又催未下則紀錄之文似成虛
典而非所以昭特勸也伏乞檢發吏部推陞李
應策前本准其陞轉又臣所惓惓

六月初四日上

回修琉璃河橋揭帖

題今日該文書官冉登捧出

聖諭諭內閣朕聞知琉璃河橋南北要路原是

皇祖時修蓋過經今年久坍塌損壞朕憫念往

來官民跋涉艱難朕昨朝謁聖母奏知聖

心嘉悅欽降銀一萬兩并朕內帑積餘及各處

進助銀兩今命內官監太監何江前去修造卿

等可傳示該部選委勤慎司官一員與同一體

以董其事務要工堅省費作速完成此乃朕意

一應工費不得科擾小民還寫勅與他諭卿等
知欽此到臣私寓臣謹焚香叩頭開讀訖仰惟
皇上大孝承親至仁拯物通居儲之泉寶造利
濟之津梁以世間珎錫世間福廓鴻恩于終古
流顯號于萬年願推此心加諸四海出民生于
已溺奠皇祚以如磐臣不勝頌禱之至除即欽
遵傳示該部遵奉外所有御札尊藏閣中以垂

永久回奏以聞

六月十六日
上

催點發各省考官揭帖

題臣昨接得禮部揭帖為議覆科場事宜等事
因浙江江西鄉試循例推舉考官上請 聖明
點用已經五次升題日期迫近跂望懸切欲臣
代為陳請臣至庸愚未測 聖意但思天下秋
場皆以八月初七日鎖院行事而浙江去京師
四千四百里江西去京師四千六百餘里原定
出差齎捧等限浙江八十八日江西九十四日
今考官事體更嚴即令日夜奔馳亦須五六十

日該部若不催請必致有誤賓興咎責奚辭故
爾屢瀆伏乞即賜點發再照以後尚有湖廣山
東山西河南陝西及應天順天諸處并乞聖
心一視同仁隨題點發庶昭右文之意而于盛
典有光矣

六月十九日上

請禱雨揭帖

題今夏酷熱異常天久不雨諸穀焦枯物價盡
踊即蔬蓏之類入市亦少加以疾癘流行瘡痢
時作群心遑遑仰籲無所恭惟 皇上敬天勤
民仁慈隱惻伏望 特諭禮部行順天府官竭
誠祈禱并令張真人醮龍行雨庶幾天心默回
聖澤溥被而萬民受更生之賜臣不勝懇祈謹
擬 聖諭一道恭進伏冀裁定施行

擬諭帖

諭禮部今歲旱熯異常田禾焦枯且多疾疫朕
心深用兢惕着大小臣工痛加修省順天府竭
誠祈禱張真人恭詣黑龍潭請雨以圖消災霈

澤

六月二十
日上

請處遼東撫鎮等官揭帖

題臣接得遼東總督巡按屢次書揭及巡撫李植自致書揭皆言巡撫與總兵該道意見不合事事叅差蓄疑蓄憤日甚一日彼此之間已成不易釋之疑與不可解之讐今總兵揭誓詞于通衢以告神明矣此豈可下與士民見而外與夷虜知乎不但不能同心報國僇力防邊必且虜至而戰守乖方盜發而緝捕推諉釀成大變有不忍言全遼之危如同累卵此鎮兩年之間

兩易撫院三易該道五易大將更換一番則地方人心搖亂一番再不得人旦晚難保巡撫李植先經奉 旨回籍聽勘吏部廷推久未點發使植候代而不得去上下離貳展布實難總兵該道又當議處皆宜妙選刻期代任今虜零竊無日不有轉眼秋到益無措手恐內變外患一時並作雖有智者不能為計臣敢不避各官嫌怨竭忠為國上聞

回廟享諭揭帖

二臣題今日該文書官張文元傳出

聖諭諭內閣近因久旱不雨天時炎熱朕昨偶爾
中暑心胸煩懣夜寢不着目今頭眩身軟廟
享親行恐暈踣不能成禮卿等傳示各官務要
虔潔恭誠供事行禮特諭卿等知之欽此謹即
傳示各該衙門欽遵外臣等伏惟廟享當親
而未舉聖心抱歎而不寧即孔子所云吾不
與祭如不祭之意仁孝之至誠也敬祖尊宗之

忱每切于內法祖紹宗之道必殷于懷不既其
文當既其實伏願事事以宗廟為重時時以續
繼為先則在天神靈鑒 皇上不得已之意而
錫萬世無疆之休矣所奉 聖諭尊藏內閣臣

等謹回奏

六月二十五日上

報平播揭帖

題臣即刻接偏橋巡撫江鐸塘報逆賊楊應龍已就天誅不勝欣喜謹以原報奏上釋 皇上

西顧之憂謹具奏知

六月二十八日上即日奉

御札諭內閣朕覽卿揭奏偏橋巡撫江鐸塘報逆賊楊應龍於六月初六日已就天誅此實仰賴天地洪庥祖宗佑助大小文武將士潺暑之時成此大功朕心嘉悅不已其赦宥無辜撫安地方合行事宜卿可傳示該部議擬具奏特諭卿知

回諭札揭帖

題今日該文書官張文元捧出

御札諭內閣

云

欽此臣恭捧開讀不勝欣誦竊

惟此賊憑凶恃險敢肆跳梁辜恩犯威難容覆
載王師遠征誠非得已但既進兵交戰理當刈
草除根騎虎背上豈能輒下故于盛夏毒暑之
候赫曦淫潦之中揮汗稱千冒死致敵亦文武
將士分義冝然至于克收成功則天地垂庥祖
宗賜佑皇上又獨持威斷密運機籌故歷世

跋扈之雄數月削平而盡不獨師武臣力能致
此也 皇上一聞戎捷即念人勞高居九重思
周萬里謂溽暑成功事非容易并加憐惻形于
詔詞即此一言解愠薰風不異矣又令臣等擬
議赦宥撫安合行事宜真所謂天地長育父母
生成固結流離之心昭蘇溝壑之望遠近聞之
誰不感泣臣即遵旨傳示該部欽奉施謹箴

聖諭于閣中

六月二十八日上

請典禮揭帖

二臣題恭惟 皇長子典禮前奉 聖諭冊立

冠婚挨次舉行臣等欽遵撰勅上進而未蒙

賜發累經大小臣工時來詢問臣等告以 聖

意天定 聖愛逾深拱候 玉音旦晚可待九

夏炎熱行禮為難不須煩言止當靜聽顧今伏

暑已盡爽氣方臨臣等欲復因循不請不能矣

時享期屆 祖宗必且鑒歆 萬壽節臨 聖

心又極歡豫矧大捷正報武功告成人心太和

天意允洽伏乞

皇上特渙綸音以成慶典

三十
日上